



Filmiliornermi aningaasartuutit utertinneqartarnerat pillugu Inatsisartut inatsisissaattut siunnersuummik saqqummiussinissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut. Inatsimmi nunatsinni filmiliornermi aningaasartuutit 25%-iinik utertitsinissaanissaq pisinnaanngortissavaa, maannalu aningaasanut inatsimmi oqaasertaliussaq aqputigalugu maleruagassiorneq taarsissallugu.

(Inatsisartunut ilaasortaq Peter Olsen, Inuit Ataqtigii)

(Siullermeerneqarnera)

Qujanaq Inatsisartunut ilaasortaq Peter Olsen siunnersuummut.

Demokraatit siunnersuuteqartoq assigalugu soqutiginnittorujussuuvoq maani nunatsinni filmiliornermut atugaannut. Taamatuttaarlu isumaqatigaarput, nunatsinnut pitsaasuussasoq, nunanit allaniit filmiliornermut tusaamasanut pilerinartunngortissinnaagutsigu.

Filmiliat annertuut nunaqavissunut pitsaassagalarput aningaasanik annertunermik isertitaqarnermik kinguneqassagamik, aammalu nunatta pinnersorsuup nittarsaanneqarneranut pitsaassagalarluni.

Isumaqarpuguttaarli, filmiliorneq tamaat isigisariaqaripput. Soorlu assersuutigalugu kissaatiginngilarput, inississinnaanerput, nunani allani filmiliornermut tapersiisarnerup maani nunatsinni filmiliornermut tapersiisarneq ajoqusissappagu. Tamanna tunngavigalugu pingaartuuvoq, filmiliornermut maani nunallit kattuffiilu siunnersuutip uuma suliarineqarnerani sukumiisumik akuutinneqarnissaat. Allatut ajornartumik ilisimasaat tusarnaartariaqarpagut, filmiliornermut pitsaanerpaanik atugassaqaqtitsinissaq pilersinniarutsigu.

Pingaartumik isumaqarpugut, siunnersuut una Inatsisartunut ilaasortamit Peter Olsen-imeersoq pitsaasuusoq, kissaatiginngilarpulli nunani allani filmiliornermut tapiisoqartassappat maani nunatsinni filmiliornermut tapiisarnermut ajoqusiinnasoq.

Paasinnilluta siunnersuut ataatsimiititaliamut susassaqaqtumut suliareqqitassatut innersuupparput.